

Ujaqqanik pinneraasiassanik nunatsinneersuunerannik uppernarsaammik allagartalersuineramik pilersitsillutik atuutitsilernissaannik Naalakkersuisut peqquneqarnissaannik inatsisartut aaliangiiffigisassaattut siunnersuut.

(Inatsisartunut ilaasortaq Peter Olsen, Inuit Ataqtigiit)

Akissuteqaat

Aatsitassanut Suliffeqarnermullu Naalakkersuisoq

Siullermeerneqarnera

Naalakkersuisut aallarniutigalugu Inatsisartunut ilaasortaq Peter Olsen, Inuit Ataqtigiit, aalajangiiffigisassatut siunnersuummik saqquumiussineranut qutsavigaat.

Aalajangiiffigisassatut siunnersuummi allassimasutut, taamanikkut Naalakkersuisuusut Kalaallit ujaraataasa erlinnartut uppernarsaatigisinnaasannik periarfissanik assigiinngitsunik nassuiaasioqqullugit 2015-imi Inatsisartut peqqusipput.

Ujaqqanut pinneraasiassanut Kalaallit Nunaanneersunut akuersissummik allagartaliisarnermut aaqqissuussinermik pilersitsinissaq pillugu apeqqut, siusinnerusukku § 37 naapertorlugu apeqqutip nr. 2018/335-ip 14 januar 2019-imeersup akissuteqarfigineqarnerani sammineqarsimasoq, aalajangiiffigisassatut siunnersuuteqarneq iluatsillugu oqaatigineqassaaq. Akissuteqaammi allassimavoq, nunatsinni annikitsumik aatsitassarsiornissamut pisinnaatitsissummik pigisaqartut kingullermik oqaloqatigineqarnerat, taakkualu akuersissummik allagartaliisarnermut aaqqissuussinermut soqutiginninnerat, aallaavigalugit Naalakkersuisut aalajangiinissaannut tunngavissat suliarineqarsimasut.

Akuersissummik allagartaliisarnermut aaqqissuussinermut siunertaavoq nittarsaassinermut ataatsimoorussamik aallaaveqalersitsinissaq aammalu tunisassiap asseqanngitsuuneranik aammalu Kalaallit Nunaanni piiarneqarsimallutillu suliarineqarsimaneranik pisisunut qulakkeertinneqarnissaa. *"Ujaqqanut pinneraasiassanut aamma ujaqqanut qiperukkanut Kalaallit Nunaanneersunut akuersissummik allagartaliisarneq pillugu nassuiaammi"* 2017-imi juunimeersumi inassutigineqarpoq, akuersissummik allagartaliisarnermut aaqqissuussineq nittarsaassinermik aallaaveqartoq iluaqutissartaqarnerpaassasoq. Aaqqissuussineq taamaattoq ujaqqap pinneraasiassap ilisarnaataanit imaluunniit aatsitassalerinnermit aqunneqartussaangilaq, kisianni tunisassiamik katersisimanermit tunisinnermut aningaasarsiorfiit tamarmik ilaatinneqartussaallutik. Akuersissummik allagartaliinerit taamaattut tunisassiap suminngaanneerfianut aammalu tunisassiaq najukkami akerleriiffiunngitsumi aammalu sulinermit avatangiisitigut torersunik atugaqarluni suliarineqarsimasoq uppernarsaateqarnissamik pisisumut qulakkeerisussaapput.

Tamatuma saniatigut akuersissummik allagartaliisarnermut aaqqissuussineq ilisimatuussutsimut tunngassuteqartoq Kalaallit Nunaanni pilersissallugu naleqqutinngitsoq, nassuiaammi naliliisoqarpoq. Ilisimatuussutsimut tunngassuteqartumik akuersissummik allagartaliinermit ujaqqat pinneraasiassat ataasiakkaat tamarmik misissoqqissaarneqarnissaat pisariaqartussaavoq, tassani misissueqqissaarnermut aningaasartuutit, ujaqqap pinneraasiassap suussusaa, ujaqqat oqimaassusaa kiisalu misissueqqissaarnerup sukumiissusaa apeqqutaallutik, ujaqqamut ataatsimut 450-imiit 5000 koruunit tikillugit akornannut missingersorneqarlutik. Akuersissummik allagartaliisarnerit taamaattut ujaqqanut

pinnersaasiassanut akisuunut sammitinneqarnerusarput, tassani nalilersuineq arlaannaannulluunniit attuumassuteqanngitsumit suliarineqartarluni, aammalu amerlanertigut laboratoriani ingerlanneqartarluni.

Kiisalu oqaatigineqassaaq Kommuneqarfik Sermersuumit tusarniaanermut akissuteqaammi aamma kusanartulianik pisiniarfinni apersorneqartuni nangaanerit arlaqarsimmata, ilaatigut akuersissummik allagartaliisarnermut aaqqissuussineq akisoorujussuusinnaasoq aammalu allaffissornerujussuarmik pilersitsisinnaasoq.

Nassuiaat tunngavigalugu Naalakkersuisut suliniummi suleqatigiinnik, siunnersuut ineriartortillugu suliaqarnerup ingerlateqqinnissaanik suliaqartussamik, pilersitsipput. Suliniummi suleqatigiit sinnerlugit Aatsitassanut Aqutsisoqarfik 2018-imi februaarimi akuersissummik allagartaliisarnermut aaqqissuussinermut nittarsaassinermik aallaaveqartumut siunnersuut pillugu annikitsumik aatsitassarsiornissamut pisinnaatitsissummik pigisaqartunut tusarniaanermik nassiuusivoq. Tusarniaanermut akissuteqaatini siunnersuut eqqarsarnartoqartillugu oqaatigineqarpoq.

Naalakkersuisut 2018-imi decembarip aallartinnerani Nuummi Hotel Hans Egede-mi annikitsumik aatsitassarsiorneq pillugu seminarertitsipput. seminarertitsinermi annikitsumik aatsitassarsiornissamut pisinnaatitsissummik pigisaqartut 20-it sinnerlugit peqataapput, tassani akuersissummik allagartaliisarnermut aaqqissuussinermik atuutsitsilernissaq oqallisigineqarluni. Annikitsumik aatsitassarsiornissamut pisinnaatitsissummik pigisaqartut oqarnerat malillugu, akuersissummik allagartaliisarnermut aaqqissuussineq nittarsaassinermik aallaaveqartoq isumassarsiatsialattut isigineqanngilaq. Tamatumunnga taarsiullugu akuersissut allagartaq nunani tamalaani ilisimatusarfinit tunniunneqartartoq niuernikkut annertunerusumik sunniuteqarsinnaanerarneqarluni, taparserneqarpoq. Siusinnerusukkut oqaatigineqartutut aaqqissuussineq taamaattoq teknikkikkut aningaasaqarnikkullu qaffasinnerusunik piumasaqaateqarfiusussaavoq, tamannalu isumalluutini allaffissornermilu annertuunik aningaasartuuteqartitsisussaavoq. Aningaasartuutit taakkua pitsaasumik pissarsiaqarnissamut naapertuutinngitsut Naalakkersuisut naliliipput.

Taamatut oqaaseqarlutik Naalakkersuisut aalajangiiffigisassatut siunnersuutip itigartinneqarnissaa inassutigaa.